

## Siunnersuummut nassuiaatit

### Nassuiaatit nalinginnaasut

#### 1. Aallaqqaasiut

Avatangiisit innarlitsaaliorneqarnissaat pillugu Inatsisartut inatsisaata nr. 9-p, 22. november 2011-meersup (matuma kingorna avatangiisinut inatsisip imaani avatangiisit illersorneqarnissaat pillugu Inatsisartut inatsisaannut nr. 15-imut, 8. juni 2017-imeersumut (matuma kingorna immami avatangiisinut inatsit) naleqqussarneqarnissaa siunnersuummi siunertaavoq, taamaalilluni oqaatsit arlallit assigiimmik nassuiarneqassallutik, Naalakkersuisunullu piginnaatitsissutit imannak oqaasertalerneqassallutik inatsisit marluk tamaasa naapertorlugit mingutsitsinernut aalajangersimasumik iluseqartunut suliniuteqartoqarsinnaalerlugu.

Inatsisit marluk taakkua akornanni naleqqussaanermut assersuutitut taaneqarsinnaavoq, aatsitassanut ikummatissanullu inatsimmut tunngatillugu killissalersuineq.

Avatangiisinut inatsit naapertorlugu killiliineq inatsimmi § 4-mi aalajangersarneqarpoq, avatangiisinut inatsimmi ”aatsitassat pillugit ingerlatallu tamatumunnga pingaarutillit pillugit Inatsisartut inatsisaanut suliat ilaatinneqartut” tassunga ilaatinneqanngitsut. Imaani avatangiisit illersorneqarnissaannut inatsimmi § 6 malillugu inatsit ”ingerlataqarnernut Kalaallit Nunaanni aatsitassanut ikummatissanullu inatsimmi pineqartunut ilaasunut atatillugu”, atuutinngilaq.

Oqaasertaliinerit marluusut taakkua assigiinngissutaat tassaavoq, aatsitassanut ikummatissanullu inatsit atuutinngippat imaanili avatangiisit illersorneqarnissaannut inatsit atuulluni, aatsitassanut ikummatissanullu inatsisip atuuffissai killeqarsimappata, avatangiisinut inatsisip atuuffissai annertusitinneqarsimanersut qulakkeerneqarsinnaanngilaq. Tamanna taamaalilluni aatsitassanut ikummatissanullu inatsisip allanngortinneqarnerata, erngup nukingata nukissiornermut atorneqartarnera pillugu Inatsisartut inatsisaat nr. 5, 27. november 2018-imeersup akuerineqarneranut atatillugu Inatsisartut inatsisaanni nr. 16, 27. november 2018-imeersumi allanngortinneqartup, malitsigisaanik, aatsitassanik piiiaanerup nukissiamik pilersornissaanut erngup nukinganik innaallagissiorfiup avatangiisitigut nalilersorneqarnera, avatangiisinut inatsit malillugu naliliivigineqassanersoq, nalornilersitsisinnaassaaq. Erngup nukinganik innaallagissiorfik 2018-imi allanngortitsinerup kingorna aatsitassanut ikummatissanullu inatsimmi pineqartunut ilaatinneqarunnaarpoq, kisianni erngup nukinganik innaallagissiorfik ”ingerlataasoq aatsitassanik piiiaanermut toqqaannartumik pingaaruteqartoq” oqartoqarsinnaanersoq ersarinnani.

Avatangiisinut inatsisip allanngortinneqarnissaa pillugu Inatsisartut inatsisissaattut siunnersuummi matumani siunnersuutigineqarpoq, imaani avatangiisit illersorneqarnissaannut inatsimmi oqaasertaliineq avatangiisinut inatsimmut nuutinneqassasoq.

Assersuutini allani taaneqarsinnaapput ”mingutsitsinerit allat” pillugit imaani avatangiisit illersorneqarnissaannut inatsimmi § 35, mingutsitsisunut akuliunnissamut periarfissiisoq, allatigut inatsisini maleruagassiivigineqarsimanngitsaq.

Siunnersuutigineqarpoq aalajangersagaq taamaaqataa avatangiisinut inatsimmi § 40a-tut nutaatut ilanngunneqassasoq.

Allannguutit, imaani avatangiisinut inatsisip Inatsisartunit akuerineqarneranik tunngaveqartut, matuma kinguliani immikkoortoq 2-mi erseqqinnerusumik nassuiarneqarput.

Tamatuma saniatigut avatangiisinut inatsimmi § 66-imi aalajangersakkat aalajangersimasut unioqqutinneqarneranni akiliisitsinissamik aalajangersaasarneq pillugu aalajangersakkat allanngortinneqassasut siunnersuutigineqarpoq. Avatangiisinut inatsisip 2011-imi akuerineqarnerani paasinarsisimavoq, § 66 aamma § 36 imminnut naapertuukkunnaarsimasut, tassami avatangiisinut inatsisissatut siunnersuutip suliarineqarnerani § 36-ip allanngortinneqarnissaa Inatsisartut akuerimassuk, taamaalilluni siunnersuutaqaartumi imm. 3, inatsimmi akuerineqartumi imm. 4-nngorluni. Kisianni § 66, imm. 1, nr. 4 akuersissuteqarnermut tassunga naapertuuttumik allanngortinneqanngilaq, taamaalilluni ”§ 36, imm. 3” malillugu peqqusissuteqarnerup, inerteqquteqarnerup atugassarititaasulluunniit unioqqutinneqarnerannut akiliisitsinermik pineqaatissiisoqarsinnaassasoq sulii aalajangersagaalluni.

Innuttaasup angallatip ikkarlissimasup peerneqarnissaa pillugu peqqusissummik malinnissimanninnerani, Kalaallit Nunaanni Eqqartuussivinni Nunattalu Eqqartuussiviani pinerluuteqartumik suliaqarnermi, innuttaasoq pinngitsuutinneqarpoq, peqqusissuteqarneq unioqqutinneqartoq § 66-imi pineqaatissiisarnermut aalajangersakkami pineqartunut ilaatinneqannginnera pissutigalugu.

Allannguutissatut siunnersuummi naapertuutinningsup taassuma iluarsineqarnissaa siunertaavoq, taamaalilluni aalajangersakkat eqqartuussivinni sunniuteqarluartumik atuutsinneqarsinnaassallutik.

Aammattaaq siunnersuutigineqarpoq, eqqakkanik eqqussineq pillugu maleruagassani aalajangersimasunik allanngortitsisoqassasoq, eqqagassalerineq pillugu nunap immikkoortuini suleqatigiinnissamik ajornarunnaarsitsisunik.

## **2. Siunnersuummi immikkoortut pingaarnertit**

### **2.1. Inatsisip aatsitassanut ikummatissanullu inatsisinut attuumassuteqarnera**

Aatsitassanut ikummatissanullu inatsit, Inatsisartut inatsisaat nr. 77. december 2009-imeersoq, pisortatigoortumik imatut qulequtaqarpoq: ”Aatsitassat pillugit ingerlatallu tamatumunnga pingaarutillit pillugit inatsisartut inatsisaat”. Avatangiisinut inatsisissatut siunnersuut 2011-imi Inatsisartunut saqqummiunneqarmat, inatsisip aatsitassanut suliaasaqarfimmi maleruagassiinermik imaqaannginnissaata erseqqissarneqarnissaa pingaaruteqarsimavoq, tassami aatsitassanik piianeq il.il. aatsitassanut ikummatissanullu inatsimmi kiisalu akuersissutini tamanna malillugu tunniunneqartuni maleruagassiivigineqartussaammat. Inatsit, ingerlatassanut ”aatsitassat pillugit ingerlatallu tamatumunnga pingaarutillit pillugit Inatsisartut inatsisaanut toqqaannartumik sulianut ilaatinneqartunut” atatillugu avatangiisit innarlitsaaliorneqarnissaat pillugu maleruagassanik aalajangersaanermi pineqartunut ilaassanngitsoq, taamaalilluni § 4 oqaasertalerneqarpoq. Aalajangersakkamut tassunga

nassuiaatini oqaatigineqarpoq, ”ingerlatat tamatumunnga toqqaannartumik pingaarutillit” assersuutigalugu pisinnaatitsissummik pigisaqartup ”aatsitassanut inatsit malillugu aatsitassarsiornissamut akuersissummut toqqaannartumik atatillugu sanaartornissamik, aqqusinniornissamik allamilluunniit” kissaateqarluni pisoqarneranut tunngassuteqartoq. Taamaalilluni aatsitassanut ikummatissanullu inatsisip pisortatigoortumik qulequtaata atorneqannginnissaa toqqarneqarpoq, kisianni oqaaseq ”toqqaannartumik” ilanngunneqarluni. Taamaattumik ingerlatassaq pineqartoq aatsitassanut ikummatissanullu inatsimmi pineqartunut ilaatinneqarunnaarualuartoq, ingerlatassaq avatangiisinut inatsimmi § 4-imi ilaatitsinnginnermi pineqartunut ilaassanersoq, nalornissutigineqalersinnaassalluni.

Taamatut nalornissuteqarnissaq pinngitsoortinniarlugu imaanilu avatangiisinut inatsimmituulli killissaliiniarluni, § 4-p allanngortinneqarnissaa siunnersuutigineqarpoq, taamaalilluni avatangiisit innarlitsaaliorneqarnissaannut Inatsisartut inatsisaanni ingerlatassat, Kalaallit Nunaanni aatsitassanut ikummatissanullu inatsimmi maleruagassiivigineqartut, pineqartunut ilaatinneqassanatik.

Tamanna isumaqarpoq, erngup nukinganik atuinerup aatsitassanut ikummatissanullu inatsimmi pineqartunut ilaatinneqarunnaarnerani, erngup nukinganik atuinerup avatangiisitigut suliarineqarnera ingerlaannaq avatangiisinut inatsimmi pineqartunut ilaatinneqalerluni. Tamatumani Inatsisartut inatsisaanni nr. 16, 27. november 2018-imeersumi aatsitassanut ikummatissanullu inatsisip allanngortinneqarnera innersuussutigineqarpoq.

## 2.2. Eqqakkanik eqqussuineq avammullu annissuineq

§ 38 malillugu eqqakkanik Kalaallit Nunaannut eqqussuineq inerteqqutaavoq, atoqqiinissaq siunertaralugu eqqakkanik navianartuunngitsunik eqqussuineq pineqarsimanngippat, kisianni eqqakkanik eqqussuineq tamarmi Naalackersuisunit akuerineqarsimasussaavoq. Eqqakkanik avammut annissuineq tunngaviatigut akuerisaavoq, kisianni nunanut eqqakkanik navianartunik killeqarfiit qaangerlugit assartuinerup taakkualu iginneqarnissaasa nakkutigineqarnera pillugu Basel-imi nunani tamalaani isumaqatigiissummi pineqartunut ilaasunut taamaallaat pisinnaalluni.

Naalackersuisut isumaqarput Naalackersuisut eqqakkanik eqqussuineq avammullu annissuineq pillugu maleruagassanik aalajangersaanissamut piginnaatinneqarnerat pillugu aalajangersakkamik § 38-ip tapertaqartinneqarnissaa pisariaqartinneqartoq. Aammattaaq siunnersuutigineqarpoq, nunat eqqussiffigineqartut imaluunniit nunat akunniffiusimasinnaasut eqqakkanik tigusiumannginnissaasa ilimaginissaanut pissutissaqarpat, eqqakkanik avammut annissuinerup inerteqqutiginnissaanut Naalackersuisut piginnaatinneqassasut. Aalajangersakkani taakkunani siunertaavoq, eqqakkat navianarnersut nalornissutigineqarsinnaappat, assersuutigalugulu nunap tigusisussap eqqakkat nassiunneqartut taakkua tigusissaat akuersaanngikkaa pillugu nunamit tigusisussamit saaffiginnissummik tigusaqartoqarsimappat, eqqakkanik avammut annissuinerup Naalackersuisut akuliussinnaanerisa qulakkeerneqarnissaa.

Kiisalu siunnersuutigineqarpoq eqqakkanik eqqussuinerup akuerineqarnissaanut § 38-imi periarfissanik annertusititsisoqassasoq. Annertusititsinerup kingunerisaanik siunissami eqqakkanik eqqarneqartussanngorlugit, soorlu ikuallallugit, eqqussinissamik akuerinissaq

ajornarunnaassaaq. Maannamut eqqakkanik atoqqiinissaq siunertaralugu eqqussinissaq taamaallaat akuerineqarsinnaasimavoq. Eqqussinissamut suli akuersissuteqarnissaq piunasaqaataavoq, aammalu nunatsinni eqqakkanik pineqartutut annertussusilinnik suussusilinnillu passussinissamut naammattumik inissaqartitsisoqartoq Naalakkersuisut naliliinissaat tunngavissaatitaalluni. Inissineqartussanik eqqakkanik eqqussisoqarsinnaassanngilaq. Aamma eqqakkanik navianartunik eqqussisoqarsinnaassanngilaq.

### 2.3. Mingutsitsinerit allat

Imaani avatangiisinut inatsimmi kapitali 14 qulequtaqarpoq ”Imaani mingutsitsinerit allat”. Kapitalimiippoq § 35, nukissiuutit, sananeqaatit atortussalluunniit, imaani avatangiisinut inatsimmi aalajangersakkanut allanut ilaatinneqanngitsut atorlugit mingutsitsinissamut pinaveersaartitsinerimut akornusiinissamullu maleruagassanik Naalakkersuisut aalajangersaanissaannik piginnaatitsisoq. Aammattaaq § 35, imm. 2-mi aalajangerneqarpoq suliav atangiisinik mingutsitsinermik nassataqartut ajoqusisulluunniit taamaalisoqarsinnaaneraniilluunniit ulorianartorsiortitsisut, imaani avatangiisinut inatsimmi aalajangersakkanut allanut ilaatinneqanngitsut pillugit, avatangiisinut sunniutigisinnaasaat pillugit, Naalakkersuisut maleruagassanik aalajangersaasinnaasut, aalajangiisinnaasut piunasaqaateqarsinnaasulluunniit.

Imaani avatangiisinut inatsisissamut nassuiaatini allassimavoq, § 35, imm. 1-imi aalajangersagaq, ”aalajangersakkatut katersuiffiusutut” ilusiligaasoq, nunani tamalaani isumaqatigiissutinik nutaanik, isumaqatigiissutinilluunniit pioreersunut allannguutissanik piviusunngortitsinissamut maleruagassanik, imaani avatangiisinut inatsisissatut siunnersuummi piginnaatitsissutinut aalajangersakkat sukumiinerusut iluaniitinneqarsinnaanngitsunik, aalajangersaanissamut, periarfissiisoq. Aalajangersagaq pissutsit immikkuullarissut Kalaallit Nunaanni avatangiisinut immikkut pingaaruteqartut pillugit maleruagassanik aalajangersaanermut aamma atorineqarsinnaavoq. Maleruagassat taamaattut imaani avatangiisinut inatsimmi siunertaanut atuuffissaanullu inatsimmi kapitali 1-imi aalajangersakkani nassuiarneqartunut, naapertuutissasut piunasaqaataavoq.

Naalakkersuisut isumaqarput avatangiisinut inatsimmi aalajangersakkamik katersuiffiusumik taamaaqataanik, aalajangersagaqartariaqaraluartoq. Siunnersuummittaaq naatsorsuutigineqarpoq, piginnaatitsissut Inatsisartut inatsisaanni siunertamut atuuffissaanullu naapertuuttumik atorineqassasoq, taamaattumillu aatsitassanut suliassaqarfik pillugu maleruagassanik atuutsitsilernissamut aalajangersagaq atorineqarsinnaanngilaq. Kisianni maleruagassiinermut nalunaarummi aalajangersarneqartussatut eqqarsaatigineqarsinnaasumut assersuutitut taaneqarsinnaavoq nunami sumiiffimmi qaammaqqutinik mingutsitsineq, assersuutigalugu ataaniit qullernik qaqqanik illuutinilluunniit qaammaqqusiisimaneq imaluunniit qulliit uumasunut akornusersuisinnaasunngorlugit atorineqarnerat. Suliffissuarni suliaqarnermit imermik nillusaammik kuutsitsineq, kissamik mingutsitsinertut, nalunaarummi maleruagassiivigineqarsinnaasutut, aamma isigineqarsinnaavoq.

Aalajangersagaq § 40 a-tut ilanngunneqassasoq siunnersuutigineqarpoq, tassanilu Naalakkersuisut maleruagassanik aalajangersaasinnaanissaat,

peqqussuteqarsinnaanissaat inerteqquteqarsinnaanissaallu, kiisalu sulianut, inatsimmi maleruagassanut allanut ilaanngitsunut piumasqaateqarsinnaanissaat periarfissinneqarpoq. Aalajangersagaq imaani avatangiisit illersorneqarnissaannut inatsimmi § 35-mut annertuumik assinguvoq, kisiannili avatangiisinut inatsisip atuuffissaanut naleqqussagaavoq, imaani avatangiisinut inatsimmi § 35 imaani avatangiisinut inatsimmi pingaartumik umiarsuit angallattut maleruagassiuunneqarnissaat eqqarsaatigalugu immikkoortunut marlunnut avitaammat.

Siunnersuummi § 40 a aamma imaani avatangiisinut inatsimmi § 35 tunngavigalugit Naalakkersuisut maleruagassanik ataatsimoortunik aalajangersaasinnaarusupput, tamatumani suliassap immamut imaluunniit nunamut sunniuteqarnissaa apeqqutaatinnagu.

#### 2.4. Attaveqaqatigiinneq tamanullu saqqummiussineq

Inatsimmi kapitali 11-mi § 48 allannngortinneqassasoq siunnersuutigineqarpoq, taamaalilluni imaani avatangiisit illersorneqarnissaannut inatsimmi kapitali 20-mi § 51-imut naapertuunnerulissalluni. Allanguut pingaarnerpaaq tassaavoq, innuttaasunut attaveqaqatigiinneq kiisalu tamanut saqqummiinerit tamallu akuutinneqarnerat digitalinngorlugu taamaallaat pinissaanik maleruagassaliornissamut Naalakkersuisut piginnaatinneqarnerat. Tamanna assersuutigalugu pilersaarutit amerlanerusunit soqutigineqarsinnaasut pillugit tamanut ammasumik tusarniaanermi immikkut pingaaruteqarsinnaavoq. Tassani tamanut saqqummiineq oqartussap nittartagaani pisinnaavoq.

#### 2.5. Nakkutilliinermut oqartussap suliaqarnera

Ingerlatsinerup uneqattaarneri ajutoornerilluunniit annertuumik mingutsitsinermik imaluunniit tamatumava navianaateqarneranik malitseqarpat, ingerlatanut mingutsitsinermik pissutaasinnaasunut akisussaasuusoq nalunaaruteqartussaataitaanermik avatangiisinut inatsimmi § 53-imi pisussaaffilerneqarpoq.

Naalakkersuisut isumaqarput nalunaaruteqartussaataitaaneq annikippallaamik nassuiarneqartoq, pissutigalugu annertuumik mingutsitsineq tamatumaluunniit aarlerinaateqarnera ingerlatsinerup uneqattaarnerata ajutoornerilluunniit malitsiginngikkaluaraa, ingerlataqarneq allatigut Inatsisartut inatsisaannut unioqqutitsisumik mingutsitsinermik tamatumaluunniit navianaateqarneranik malitseqarsimappat, nalunaaruteqartussaataitaaneq aamma atuuttariaqaraluarpat. Taamaattumik siunnersuutigineqarpoq § 53, imm. 1-imi imm. nutaatut tamatumunnga erseqqissaaneq ilanngunneqassasoq.

Aammattaaq siunnersuutigineqarpoq, § 53-imi imm. 2 nutaaq ilanngunneqassasoq, tassani nunaminertamik atugassinneqarsimasup nunaminertamilluunniit atuisinnaatitaasup, kisianni nammineerluni nunaminertami mingutsitsisartunik suliaqanngitsup, nalunaaruteqartussaataitanera atuutinneqalerluni. Assersuutigalugu pisinnaatitsissummik pigisaqartup paasippagu uuliatanki erngalersimasoq taamaalilluni nuna mingutsinneqarluni.

Aamma siunnersuutigineqarpoq Inatsisartut inatsisaanni kapitali 12-imi aalajangersakkat marluk nutaat, § 54 a aamma § 54 b nutaat ilanngunneqassasut.

Kalaallit Nunaanni Politiinit piginnaatitaaffigineqanngitsunik nakkutilliinermut oqartussaq piginnaatitaanernik atuinnginnissaata qulakkeernissaa § 54 a-imi pineqarpoq. Politiit inatsisunik unioqquitsinermik misissuinissamut periarfissaqarnerisa, pasineqartup iliuuseqannginnissamut periarfissaannut pineqartullu pisuussuteqarnerata ajornannginnerusumik aalajangerneqarneranik malitseqartumik paasissutissanik tunniussinissamut pisussaaffeqannginnerata akornanni oqimaaqatigiissitsinissamik pingaaruteqartumik Kalaallit Nunaanni Eqqartuussisarnermik inatsit imaqarpoq. Tunngaviusoq taanna Europami Inuit pisinnaatitaaffiitut nunani tamalaani isumaqatigiissummik tunngaveqarpoq imminullu unioqquitsinerarnissamik inerteqquteqarnermik taagorneqarluni, tassalu inuit pinerluuteqarsimasunut suliassami imminnut akornutaanngitsumik illersornissaat, assersuutigalugu nipangersimaannarnermikkut. Innuttaasoq suliffeqarfillaunniit pineqartoq ataasiakkaatigut paasineqanngippat, pinerluuteqarsimasunut suliame politiinut paasissutissiisussaataasinnaanermi, avatangiisinut inatsimmi nakkutilliinermut oqartussanut paasissutissanik tunniussinissamik oqartussanullu mingutsitsisoqarsimasinnaanera il.il. pillugit nalunaaruteqarnissamut pisussaaffeqarneq annertunerusussaangilaq.

Avatangiisinut inatsit unioqquatinneqarsimasoq, akiliisitsinermi pineqaatissiinermik kinguneqarsinnaasumik, nakkutilliinermi suliame aalajangersimanerusumik pasitsaassisoqarpat, nakkutilliinermut oqartussap suliame eqqartuussisarnermik inatsit malillugu paasiniarneqarnera ingerlaqqittussanngorlugu Kalaallit Nunaanni Politiinut tunniutissavaa. Kisianni taamaattoq inatsisip unioqquatinneqarsimasinnaanera qulaajaaviginissaanut nakkutilliinermut oqartussaq nammineerluni pisariaqartunik misissuisinnaavoq.

§ 54 b-mi aammattaaq siunnersuutigineqarpoq, nakkutilliinermut oqartussaq nakkutilliinerup il.il. nalaani assiliisinnaasoq, pappiaqqat assinginik tiguisinnaalluni imaluunniit allakkiat nassarsinnaallugit kiisalu akeqanngitsumik pigisanik allanik nassarsinnaalluni. Nassarneqarsinnaasunut assersuutitut taaneqarsinnaapput nunap iluaneersunit misissugassaq mingutsinneqarsimasutut isigineqartoq, mingutsitsinerullu suussusaata paasiniarnissaanut laboratoriami misissoqqissaarneqarnissaanut periarfissaqarnissaq kissaatigineqarluni. Taamaaqataanik nakkutilliinermut oqartussap nioqqutissanit, akuutissanik uumaatsunik il.il. ajoqusiisartunik mingutsinneqarsimasutut pasitsaanneqartunit, nioqqutissamik misissugassamik nassarsinnaavoq.

§ 54 b aalajangersakkanut imaani avatangiisit illersorneqarnissaannut inatsimmi § 44, imm. 2-tut aamma § 49, imm. 4-tut, imaani avatangiisit illersorneqarnissaat pillugu Inatsisartut inatsisaata allanngortinneqarnera pillugu Inatsisartut inatsisaanni nr. 8, 27 november 2018-imeersumi ilanngunneqartumut, naapertuuppoq. Oqartussaq allakkianik pigisanilluunniit nassarsinnaanera pillugu aalajangersakkap arsaarinnittarneq pillugu aalajangersakkatut paasineqarsinnaanera pinngitsoortinniarlugu, allakkiat pigisallu kingusinnerpaamik ulluinnat 14-it qaangiunneranni utertillugit tunniunneqassasut, ilanngunneqarpoq. Aalajangersagaq taamaattoq Atuisartoqarnermut Unammilleqatigiinnermullu Aqutsisoqarfiup piginnaatitaaffii pillugit unammilleqatigiinneq pillugu Inatsisartut inatsisaanni § 32-imiippoq. Nassarneqartut

aningaasaqarnikkut naleqanngippata, assersuutigalugu nunap iluaneersunit misissugassaq mingutsinneqarsimasoq, utertitsinissamik pisussaaffeqarneq atuutissanngilaq.

## 2.6. Kapitali 13 a nutaaq, aalajangersakkat allat

Imaani avatangiisit illersorneqarnissaannut inatsimmi § 57-imi aalajangersarneqarpoq, avatangiisit mianerineqarnissaat imaluunniit nunani tamalaani akuersissutit malinneqarnissaat eqqarsaatigalugit tamanna pisariaqartinneqalerpat, akuersissuteqarnerit immikkullu ittumik akuersissuteqarnerit inatsit siusinnerusukkulluunniit inatsisit naapertorlugit tunniunneqarsimasut, sukkulluunniit allannortinneqarsinnaasut uterteqquneqarsinnaasulluunniit. Aammattaaq aalajangersarneqarpoq allannortitsineq utertitseqqusinerluunniit sapinngisamik tamatumunnga naleqquttumik piffissaliinermik ilaqartinneqassasoq.

Siunnersuutigineqarpoq aalajangersakkap taamaaqataa ”Aalajangersakkat allat” pillugit kapitali 13 a-mi nutaami avatangiisinut inatsimmi § 59 a-tut ilanngunneqassasoq.

Taamaattoq siunnersuutigineqarpoq nakkutilliinermut oqartussap akuersissutinik il.il. utertitsinissamut piginnaatitaanera, akuersissuteqarnernut immikkut mingutsitsisunik suliaqarnerit pillugit inatsimmi kapitali 5-imi pineqartunut ilaatinneqartunut, atuutissanngitsoq. Akuersissut atugassarititaasullu tassani aalajangersarneqartut aatsaat ukiut arfineq pingasut sinnerlugit ingerlareerneranni allannortinneqarsinnaasut § 24-mi aalajangersagaanera, taamatut killiliisoqarneranut pissutaavoq. Taamatut piffissamik killiliineq inuussutissarsiutinut immikkut ittunut sivikillisinneqarsinnaavoq, taamaattoq ukiunit sisamanit sivikinnerussanani. Naalakkersuisut isumaqarput taamatut oqimaaqatigiisitsinissaq § 24-mi oqariartuutigineqartoq atuutsiinnarneqassasoq, kisianni tamatumunnga immikkut avatangiisinut tunngasut tunngavilersuutigineqarpata akuersissutit il.il. allat utertinneqarsinnaasut allannortinneqarsinnaasasulluunniit.

Allannortitsineq utertitsinissarlunniit innuttaasup suliffeqarfiulluunniit pineqartup taarseeqqusisinnaaneranik malitseqassanersoq, piginnaatitsissutitut aalajangersakkami tassani isummerfigineqanngilaq. Kisianni allannortitsinissamut utertitsinissamulluunniit naleqquttumik piffissamut killiliussassamik aalajangersaanermi, taarsiissuteqarluni akiliisoqassanngitsoq tunngavigineqarajussaaq, allannortitsinerlu utertitsinissarlunniit pineqartumi pissutsini tunngavilersorneqarsinnaalluni, taamaalilluni utertitsineq inuiaqatigiit eqqarsaatigalugit pisariaqartutut isigineqartariaqarluni, taamaattumillu taarsiinissamik malitseqassanani. Apeqqutip inaarutaasumik aalajangiiffigineqarnissaa suliani ataasiakkaani eqqartuussiviit ataanni pissaq.

## 2.7. Pineqaatissiisarnermut maleruagassat

Matuma siuliani imm. 1-ip ataani allassimasutut, kukkunerup 2011-mi Inatsisartut inatsisaata akuerineqarnerani pisup iluarsinissaanut, § 66, imm. 1, nr. 4-p allannortinneqarnissaa pisariaqarsimavoq. Kisianni tamatuma saniatigut § 66, imm. 1, nr. 2-5 allannortinneqarput, taamaalilluni aalajangersakkat allannuutissatut inatsimmi

matumani ilanngunneqartussatut siunnersuutigineqartut unioqqutinneqarnerannut pineqaatissiinernik aalajangersaanissaq ajornarunnaarluni.

§ 66, imm. 3-imi nalunaarummi pineqaatissiissutissanut maleruagassanik aalajangersaanissamut tunngassuteqartumi, § 36, imm. 3-imut, § 38, imm. 5-imut, aamma § 40 a-mut innersuussutunik ilanngussinissaq siunnersuutigineqarpoq. Aamma aalajangersakkap oqaasertaasa iluarsineqarnissaat siunnersuutigineqarpoq, pineqaatissiissutissanut maleruagassat sorliit, inatsimmi tunngavissanut aalajangersakkat § 66, imm. 3-imi allattorsimasut naapertorlugit nalunaarummi aalajangersarneqarsinnaanersut, nalornilersitsisinnaasumik nassuiaanissaq nalornissutigineqartussaajunnaarlugu.

### **3. Pisortanut aningaasaqarnikkut allaffissornikkullu sunniutaasussat**

Siunnersuut Namminersorlutik Oqartussanut kommuninulluunniit aningaasaqarnikkut sunniuteqarnissaa naatsorsuutigineqanngilaq. Siunnersuut avatangiisinut suliassa qarfiup allaffissornikkut aqunneqarnerata pitsaanerulerneranik ataqatigiinnerulerneranillu kiisalu sunniuteqarluarnerusumik atuutsinneqarneranik malitseqarsinnaassaaq, kisianni aallaaviatigut siunnersuut allaffissornikkut sunniuteqassangatinneqanngilaq. Eqqakkanik ikuallatassat eqquassinissamut akuersissummik tunniussisoqarsimatillugu, tamanna aamma akuersissutunik taakkuninnga tunniussinermut pisortanut aningaasaqarnikkut allaffissornikkullu killilimmik sunniuteqarsinnaassaaq. Illuatungaatigut qinnuteqartup eqqakkat ikuallanneqarnissaannut akiliuteqarnera, kommunini ataatsimoortuni eqqagassalerinernut aningaasaqarnikkut ingerlatsinikkullu iluaqutissartaqarsinnaassaaq.

### **4. Inuussutissarsiortunut aningaasaqarnikkut allaffissornikkullu sunniutaasussat**

Siunnersuut inuussutissarsiortunut aningaasartuuteqarnikkut sunniuteqassangatinneqanngilaq, siunnersuummi inuussutissarsiortut akitsuutunik nutaanik allaffissornikkulluunniit nammagassanik pisussaaffilerneqanngimmata.

Nuna eqqussiviususaaq nunaluunniit aqqusaarfiususaaq eqqakkanik tiguserusunngitsoq ilimaginissaa tunngavissaqarpat, Naalakkersuisut eqqakkanik avammut annissinissamut eqqarsaatigineqartumut aalajangersimasumut inerteqquteqarnissaat, § 38-imi imm. 4-mut nutaamut siunnersuummi aalajangersakkami ajornarunnaarsinneqarpoq. Eqqakkanik piginnittoq avammut annissinissamik eqqarsaateqartoq, aalajangersakkap malitsigisaanik asulersuaq angalanermut aningaasartuuteqartariaqassanngilaq, kisianni piginnittoq eqqakkat iginneqarnissaat pillugu allatut aalajangiissaaq. Avammut annissinissamik inerteqquteqarneq qanoq aningaasartuutitigut sunniuteqassasoq eqqarsaatigineqarsinnaanersoq, erseqqissarneqarsinnaanaviannngilaq. Naalakkersuisut § 38, imm. 5 malillugu eqqakkanik eqqussuisarneq avammullu annissuisarneq pillugu maleruagassanik aalajangersaasinnaassapput. Avammut annissuineq pillugu maleruagassat eqquassinissap eqqarsaatigineqartup nalunaarutiginnissaanut pisussaaffeqarnermik imaqassasut eqqarsaatigineqarsinnaavoq. Taamatut maleruagassiineq inuussutissarsiortunut allaffissornikkut suliakkersuinermik malitseqassaaq.



§ 54 a-mi aamma § 54 b-mi aalajangersagaq ilaatigut inuussutissarsiummik ingerlataqartut inatsisitigut isumannaatsuunerannik nukittorsaataasussatut eqqarsaatigineqarpoq. Ataatsimut isigalugu aalajangersagaq aningaasartuuteqarnerulernermik malitseqassanngilaq. Kisiannili inuussutissarsiutinik ingerlataqartut, § 54 a naapertorlugu unioqqutitsisoqarsinnaaneranik ilisimatitsinissamut paasissutissanik tunniussinnginnissamut pisinnaatitaaffimminnik atuiniaratik aalajangersimasinnaasut, nakkutilliinermi oqartussaasut misissugassatut pisariaqartinneqartunik namminneerlutik misissuinissaat, misissuinerillu taakku inuussutissarsiummik ingerlataqartup pineqartup nammineerluni akiligaanik ingerlanneqarnissaat akuerisussaassavaat.

## **5. Avatangiisinut, pinngortitamut inuillu peqqissusaannut sunniutaasussat**

Siunnersuut avatangiisinik pinngortitamillu allanngutsaaliuinerup pitsaanerulerneranik malitseqassasoq naatsorsuutigineqarpoq, Naalakkersuisut mingutsitsinernik aalajangersimasumik ilusilinnik annikillisisitsinnaasussanik, allatigullu maleruagassat sunniuteqarluarnerusumik ataqatigiinnerusumillu atuutsinneqarnerannut iluaqutaasussanik, maleruagassanik aalajangersaanissamut imaluunniit peqqusissuteqarnissamut periarfissaqalissammata.

Avatangiisinik allanngutsaaliuinerup pitsaanerulernera amerlanertigut inuit peqqissusaannik pitsaanerulersitsinermik malitseqartarpoq. Taamaattoq siunnersuutip sunniutissaannik erseqqinnerusumik nalilersuisoqarsinnaanngilaq.

## **6. Innuttaasunut sunniutaasussat**

Siunnersuummi § 48-mi aalajangersagaq (§ 1, nr. 6), malillugu Naalakkersuisut pilersaarutinik tamanut ammasumik saqqummiussinissamut tamallu akuutinnissaannut taamaallaat digitalinngorlugu periarfissaqalerneranni, avatangiisinut inatsit teknikkikkut periarfissanut, suliassa qarfinni arlalinni Namminersorlutik Oqartussat ukiuni kingullerni piviusunngortissimasaannut, naleqqussarneqassapput, aamma takuuk Pisortani Digitalimik Allakkerineq pillugu Inatsisartut inatsisaat nr. 14, 8. juni 2017-imeersoq.

Naalakkersuisut Namminersorlutik Oqartussat immikkut nittartagaanni assersuutigalugu pisinnaatitsissutinik isumaqatigiissutit, neqerooruteqartut soorlu imermik sermimillu iluaquteqarsinnaalerfigisinnaasaat, saqqummiuttalereerpaat, soorlu aamma Naalakkersuisut nittartagaanni suliniutit eqqarsaatigineqartut, assersuutigalugu erngup nukinganik innaallagissiorfiliornissamut ASN-imik nalilersuineq il.il. tamanut saqqummiunneqartartut. Taamatut ineriartortoqarnera tunngavissinneqassaaq, taamaattumillu tamanna pillugu aalajangersakkamik immikkut ilanngussinissaq naapertuuppoq.

§§ 54a-imi aamma 54b-imi aalajangersakkat (siunnersuummi § 1, nr. 9) aamma innuttaasut inuussutissarsiummik ingerlataqartuunngitsut inatsisitigut isumannaatsuunissaannut pingaaruteqarpoq, tassami siunnersuummi innuttaasut naleqqutinngitsumik nanertuutaasumik akuliuffigineqannginnissaasa il.il. qulakkeernissaa siunnersuummi pineqarpoq. Aalajangersagaq ataatsimut isigalugu innuttaasunut aningaasatigut kinguneqartussatut naatsorsuutigineqanngilaq. Kisiannili innuttaasut, § 54 a naapertorlugu unioqqutitsisoqarsinnaaneranik ilisimatitsinissamut

paasissutissanik tunniussinnginnissamut pisinnaatitaaffimminnik atuiniaratik aalajangersimasinnaasut, nakkutilliinermi oqartussaasut misissugassatut pisariaqartinneqartunik namminneerlutik misissuinissaat, misissuinerillu taakku innuttaasup pineqartup nammineerluni akiligaanik ingerlanneqarnissaat akuerisussaassavaat. Misissuineritut taamaattunut aningaasartuutissat amerlassusissaannut suliami pineqartumi pissutsit aalajangersimasut apeqqutaassapput.

## **7. Sunniutaasussat annertuut allat**

§ 40 a-mi aalajangersakkami maleruagassanik aalajangersaasinnaaneq, peqqussuteqarsinnaaneq inerteqquteqarsinnaanerluunniit, kiisalu sulianut il.il. mingutsitsiviusunut, maannarpiaq Inatsisartut inatsisaat malillugu maleruagassiorneqarsimangitsunut piumasagaateqarsinnaaneq periarfissinneqarpoq. § 40 a-p atorneqarnissaa aalajangiunneqarpat, tamanna suliamut mingutsitsiviusumut pineqartumut annertuunik kinguneqartussaavoq, tamatumani aalajangersakkap qanoq iliorluni atorneqarnera apeqqutaassalluni.

§ 59 a-mi aalajangersakkap kingunerisaanik avatangiisit eqqarsaatigineqarnissaat imaluunniit nunani tamalaani isumaqatigiissutit malinneqarnissaat eqqarsaatigalugit pisariaqartinneqarpat, akuersissutit, akuersinerit immikkullu ittumik akuersissutit allanngortinneqarsinnaapput utertinneqarsinnaallutilluunniit. Allanguutissat utertitsinerillu taamaattut pineqartillugit naammaginatut piffissaliinermik ilaqartinneqartussaapput, kiisalu allanguinerit utertitsinerillu akuersissummik, akuersinermik immikkulluunniit ittumik akuersissummik utertinneqartumik allanngortinneqartumilluunniit pigisaqartumut annertuunik kinguneqarsinnaapput, taamatullu suleqataasunut allanut, taamatut utertitsinerimi allanguinerimiluunniit toqqaannangitsumik eqqorneqartunut annertuunik kinguneqarsinnaallutik.

## **8. Oqartussanut kattuffinnullu il.il. tusarniaaneq**

Siunnersuut 8. oktobari 2020-miit 5. novembari 2020-mut tusarniaanernut iserfissiaq aqutigalugu tamanut ammasumik tusarniaassutigineqarpoq.

Ukuninngaanniit tusarniaanermi akissuteqaatinik tigusaqartoqarpoq:

- Aalisarnermut, Piniarnermut Nunalerinermullu Naalackersuisoqarfik
- Ilinniartitaanermut, Kultureqarnermut Ilageeqarnermullu Naalackersuisoqarfik
- Naalackersuisut Siulittaasuata Naalackersuisoqarfia
- Kommune Kujalleq
- Kommuneqarfik Sermersooq
- Avannaata Kommunua
- Nukissiorfiit
- Avatangiisinut Inuussutissalerinermullu Ministereqarfik
- Nersutaateqarnermut Inuussutissaqarnermullu Oqartussaasut
- Issittumi Sakkutooqarfik

Tusarniaaffigineqartut ilaat nalunaaruteqarput, avatangiisinut inatsimmut allanguutissatut siunnersuummut missingiut nassiuunneqartoq pillugu oqaaseqaatissaqaratik. Matumani pineqartut tassaapput: Naalackersuisut Siulittaasuata Naalackersuisoqarfia,

Ilinniartitaanermut, Kultureqarnermut Ilageeqarnermullu Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik, Issittumi Sakkutooqarfik, Avannaata Kommunia aamma Kommune Kujalleq.

Matuma kinguliani tusarniaanermi akissuteqaatit, tusarniaanermi tiguneqartut sammineqarput. Erseqqissaatigineqassaaq, tusarniaanermi akissuteqaatit uingasunngorlugit allanneqarmata.

#### Kommuneqarfik Sermersooq

*Kommuneqarfik Sermersooq isumaqarpoq, allanguutissat avatangiisinut inatsisip nukittunerusumik aallaaveqarnissaanut, taamaalillunilu maleruagassat malinneqarnissaannut atuutsinneqarnissaannullu periarfissanik pitsaanerusunik ammaassisoqarnissaanut iluaqutaassasut. Tamatumunnga atatillugu kommuni isumaqarpoq, akiliisitsissutissatut annertussusiliussat suliniutaasut tikilluaqqusaasorujussuit. Eqqakkanik tikisitsisarnissamut avammullu nassiusisarnissamut periarfissat kommunimit isumalluarfigineqarput.*

Kommuneqarfik Sermersuumiit oqaaseqaatit NINAN-imiit tusaatissatut tiguneqarput.

#### Avatangiisinut Inuussutissaqarnermullu Ministereqarfik (MFVM)

*MFVM-mit apeqqutigineqarpoq, § 40 a-mi piginnaatitsissuteqartarnermut aalajangersakkamut nassuiaat qanoq isumaqartinneqarnermoq. MFVM-ip piginnaatitsissut umiarsuarnut maleruagassanik aalajangersaanermut atorneqarsinnaasutut paasivaa, tamannalu nunani tamalaani isumaqatigiissutini, taakkunungalu IMO Marpol Annex VI ilanngullugu, allassimavoq. MFVM-ip Kalaallit Nunaata pisussaaffimminik naammassinninnissaanut pisariaqartitsisoqartillugu piginnaatitsissut atorneqarsinnaasussatut paasivaa. Tassalu Naalakkersuisut maleruagassanik taakkuninnga aalajangersaasinnaalernissaat sioqqullugu, Kalaallit Nunaata kitaata ilaani illersuisoqarsinnaanissaa nunani tamalaani isumaqatigiissutini piumasarineqartussaavoq. Taamaattumik Naalakkersuisut maannarpiaq Kalaallit Nunaanni SECA-mut maleruagassanik aalajangersaasinnaanngillat, tamanna Marpol Annex VI-mi allassimannngimmat (suli). NINAN-imit oqaatigineqassaaq, piginnaatitsissuteqartarnerup taamaallaat nunani tamalaani umiarsuarnut maleruagassanik atuutsitsilertarnermut atorneqarsinnaanissaa siunertaanngimmat. NINAN naliliivoq, tamanna inatsisip oqaasertaani, taamatut killiliinissamut innersuussutitaqanngitsumik annertuumik atuuttussatut oqaasertaliuunneqartumi allassimasoq. Aamma inatsimmut nassuiaatini, taamaallaat piginnaatitsissutip nunani tamalaani isumaqatigiissutinik naammassinninnissamut atorneqarsinnaaneranut assersuummik saqqummiussiviusumi tamanna allassimavoq. Allatut oqaatigalugu matumani ilaatigut maleruagassat, piginnaatitsissummik tunngavilerneqarsinnaasut pineqarput. NINAN aalajangerpoq, § 40 a-mut nassuiaatit oqaasertaat ersarinnerulersinniarlugit iluarsiviginiarlugit.*

#### Nukissiorfiit

*Nukissiorfiit siunnersuummi § 38-mi eqqakkanik tikisitsisarnermut maleruagassanut aammalu nukissiornermut kissamillu tunisassiornermut sunniutaasinnaasunut tunngasunut oqaaseqaateqarput. Tamatumunnga atatillugu eqqakkanik eqqortumik akisussaassuilimmillu paaasarnissap pisariaqartinneqarnera Nukissiorfinnit tamakkiisumik akuersaarneqarpoq, aammalu qanittumik suleqatigiinnissaq, kissap sinneranik atorluaanermik salliutitsiviusussaq isumalluarfigalugu. Tamatuma peqatigisaanik Nukissiorfinniit oqaatigineqarpoq, eqqakkanik ikuallaasarnermik aaqqiissutissami nunanit allanit eqqakkanik tikisitsisarnissaq*

*piumasarineqarpat, aammalu nukissiuutinik mingutsitsinnginnerusunik qinigassaartoqartillugu nukissiuutinut annikinnerusumik mingutsitsisunut aningaasaliinissaq salliuinneqassappat tamanna aaqqiissutissatut piujuartitsiviusussatut isumaqarfineqanngitsoq.*

NINAN-imit siullertut pingaarnertullu oqaatigineqarpoq, eqqakkat siunissami nukissiornermi isumalluutitut atorneqarnerunissaat Naalakkersuisunit anguniarneqartoq, tassungalu Naalakkersuisut eqqagassalerinermut pilersaarutaanni qupp. 36 naapertorlugu eqqakkanit kissamik tunisaqartarnerup ungasianiit kiassarnermik tunisassiornermit allamit salliuinneqartariaqarnera ilaatinneqarpoq. Kisiannili tamatuma peqatigisaanik NINAN-imit erseqqissarneqassaaq, § 38-mi aalajangersakkami eqqakkanik ikuallaavinnik ingerlatsineq ingerlatiinnarniarlugu eqqakkanik tikisitsisarnissaq siunertaanngimmat, ikuallaaviit taakku taamaallaat kalaallit pisariaqartitaat tunngavigalugit annertussusilerneqartussaammata. Taamaattumik ikuallaavissat nutaat tikisitsisarnissaq siunertaralugu annertussusilerneqassanngillat, aammalu aatsaat piffissami pineqartumi ikuallaavinni pisinnaasaqartoqartillugu tikisitsisoqartartussaavoq.

*Nersutaateqarnermut Inuussutissaqarnermullu Oqartussaasut (VFMG)  
VFMG-mit maluginiarneqarpoq taaguutertik iluarsineqarsimasoq, aammalu iluarsineq pillugu qujavoq.*

NINAN-ip VFMG-mit akissut uppersarnerneqarpoq.

### **Siunnersuummi aalajangersakkanut ataasiakkaanut nassuiaatit.**

#### *§ 1-imut*

Nr. 1-imut (§ 4)

Inatsisartut inatsisaanni § 4 allanngortinneqassasoq siunnersuutigineqarpoq, taamaalilluni aatsitassanut ikummatissanullu inatsimmut tunngatillugu killissalersuineq imaani avatangiisinut inatsimmi pisutut oqaasertalerneqarluni, tassa imaappoq, ingerlataq Kalaallit Nunaanni aatsitassanut ikummatissanullu inatsimmi pineqartunut ilaatinneqanngippat, avatangiisinut inatsit atuutissaaq. Tamatuma sunniutigissavaa, aatsitassanut ikummatissanullu inatsisit allanngortinneqassappat, taamaalilluni ingerlatat aalajangersimasut aatsitassanut ikummatissanullu inatsimmi pineqartunut ilaatinneqarunnaarlutik, avatangiisinut inatsisip atuuffissai annertusitinneqassapput. Taamaaliornermi inatsit ersarinnerulersinneqassaaq, taamaalilluni maleruagassat Avatangiisinut Naalakkersuisoqarfimmit aquneqartut atuuffissaat assinganik killissalersugaassallutik, taamaalillunilu maleruagassat taakkua aamma aatsitassanut ikummatissanullu inatsisit akornanni suliassaqarfinnik maleruagassiivigineqanngitsunik pisoqalissanani.

Imm. 2.1-imi nassuiaatit nalinginnaasut ataanni allassimasutut, allanngortitsineq aammattaq aatsitassanut ikummatissanullu inatsisip Inatsisartut inatsisaanni nr. 16, 27. november 2018-imeersumi allanngortinneqarneranit aalajangersimasumik pisussanngortinneqarpoq, taamaaliornermi erngup nukinganik atuineq aatsitassanut ikummatissanullu inatsimmi pineqartunut ilaajunnaarsinneqarmat.

Nr. 2-imut (§ 33)

§ 33-ip allanngortinneqarnera aaqqissuussineruvoq, taamaalilluni inatsimmi Kalaallit Nunaanni Uumasunut Nakorsaqaarfik Inuussutissalerinermullu Oqartussaaffik, maannakkut taaguutitut atorneqartoq, innersuussutigineqarluni, tassami siusinnerusukkut oqaaseq ”Namminersorlutik Oqartussani Uumasunut Nakorsaqaarnermik immikkoortorta” atorneqarunnaarmat.

Nr. 3-imut (§ 38)

Imm. 1-imut:

Imm. 1-imi aalajangersagaq atuuttoq malillugu, eqqakkanik navianartuunngitsunik eqqussinissaq pineqarsimanngippat, Kalaallit Nunaannut eqqakkanik eqqussinissaq inerteqqutaavoq. Aammattaaq piumasagaataavoq, eqqussineq atoqqiinissaq siunertaralugu pissasoq. Inatsisit atuuttut malillugit allatut oqaatigalugu ikuallaanissaq imaluunniit inissiinissaq siunertaralugu eqqakkanik eqqussinissaq inerteqqutaavoq, taamatullu eqqakkanik navianartunik eqqussinissaq inerteqqutaalluinnarnera atuulluni.

Imm. 1-imi aamma 2-mi allannguutissatut siunnersuutigineqartuni eqqakkanik eqqussinissamut periarfissat annertusitinneqarput, taamaalilluni eqqakkanut atoqqiinissaq aammalu iginnissaat siunertaralugu eqqunneqarsinnaalerlutik. Imm. 1-imi allannguutit imm. 2-mi allannguutissatut siunnersuutitut ataqtigisillugit isigineqassapput. Taamaalilluni eqqakkanik navianaateqanngitsunik atueqqinnissaq siunnerfigalugu eqqussinissamut periarfissaq imm. 1-imit peerneqarpoq, tassungali taarsiullugu eqqakkanik eqqussinissaq pillugu akuersissuteqarsinnaanermut inatsimmi tunngavissami nutaami annertunerusumillu atuuffeqartumi, imm. 2-mi aalajangersakkami iluarsisami allassimasoq atuutsinneqalerpoq, matuma kinguliani allassimasut takukkit.

Taamatuttaaq erseqqissarneqassaaq, eqqakkanik navianartunik aamma eqqakkanik uninngatitassanik eqqussinissamik inerteqquteqarneq allanngortinneqanngimmat. Inerteqqutit taakku imm. 2-p immikkoortuata tulliani maanna allassimalerput, takukkit imm. 2-imut nassuiaatit matuma kingulianiittut.

Imm. 2-imut:

§ 38-imi imm. 2 atuuttoq malillugu, Naalackersuisut eqqakkanik eqqussinernut akuersissuteqartussaapput. Imm. 1-imi allanngortitsinerit malitsigisaannik siunnersuutigineqarpoq imm. 2-imi piumasagaatit immikkut ittut pingasut ilanngunneqassasut, taakkunanilu ilaatigut eqqakkanik navianaatilinnik aamma eqqakkanik uninngatitassanik eqqussinissamut inerteqquteqarnerit, maannamut aalajangersakkami imm. 1-imi allassimasimasut ingerlateqqinneqarput. Piumasagaatit taakkua, eqqakkanik eqqussinerup isumannaatsumik pinissaa qulakkeerniarlugu, Naalackersuisut qaqugukkut eqqakkanik eqqussinernut akuersissuteqarsinnaanersut, killissaliipput.

Piumasagaat siullesq immikkoortumi siullertut inissinneqarpoq, aammalu tamatuma kingunerisaanik eqqakkanut eqqunneqartussatut kissaatigineqartunut Kalaallit Nunaanni naammattunik passussinissamut periarfissaqarpat, eqqakkanik eqqussineq aatsaat Naalackersuisunit akuerineqarsinnaavoq. Eqqakkanik pineqartut suussusilinnik annertussusilinnillu isumannaatsumik passussisoqarsinnaanissaa, pingaarnertut piumasagaamma tassani qulakkeerneqarpoq. Taamaalilluni Kalaallit Nunaanni eqqakkanik eqqunneqartussatut kissaatigineqartunik passussinissamut naammattunik atortorissaruteqartoq inissaqartitsisoqartorlu, Naalackersuisut naliliineranni

pingaartinneqarsinnaavoq. Oqaatsimi passussineq, tassunga atatillugu ilaatinneqarput passussinerit suulluunniit, ilanngullugit atoqqiineq, atueqqinneq aamma eqqaaneq. Oqaatigineqassaaq tamanna ilaatigut isumaqartoq, Naalakkersuisut ikuallanneqartussanik eqqussinissaq akuerisinnaagaat. Kisiannili inissinneqartussanik eqqussinissaq suli inerteqqutaavoq, takuuk inerteqquteqarneq matuma kinguliani eqqartorneqartoq.

Piumasaqaatip aappaa immikkoortup aappaatut inissinneqarpoq, tassani eqqakkanik Kalaallit Nunaanni inissinneqartussanik eqqussinissaq inerteqqutigineqarpoq. Inerteqquteqarneq taanna § 38, imm. 1-imi aalajangersakkanut atuuttunut ilaavoq, taanna malillugu eqqussineq taamaallaat atoqqiinissaq siunertaralugu pisinnaasoq, tamatumani inissinneqartussanik eqqussineq mattunneqarpoq. Eqqakkanik inissinneqartussanik eqqussinissap akuerineqarnissaa kissaatigineqanngimmat, eqqussinissamik inerteqquteqarnerup ilaata, eqqakkanik inissiinissamut tunngassuteqartup ingerlatiinnarnissaa toqqarneqarpoq. Taamaalilluni eqqakkanik inissinneqartussanik eqqussinissap inerteqqutigineqarnera suli atuutissaaq. Inerteqquteqarneq imm. 1-imiit imm. 2-imut nuunneqaannarpoq, tassami imm. 2 malillugu Naalakkersuisut piginnaatitaaneranni killiliineq tassani pineqarmat.

Piumasaqaatit pingajuanni, taamatuttaaq immikkoortup aappaattut inissinneqartumi, eqqakkanik navianartunik eqqussinissaq inerteqqutigineqarpoq. Tassani imm. 1-imi eqqakkanik navianartunik eqqussinissamik inerteqquteqarneq atuuttoq ingerlateqqinneqarpoq. Inissiinissamik inerteqquteqarnertuulli, inerteqquteqarneq attatiinnarneqassasoq matumani siunnersuutigineqarpoq, kisianni imm. 1-imiit imm. 2-imut nuunneqarluni, tassami Naalakkersuisut imm. 2 malillugu piginnaatitaaneranni killiliinissaq tassani pineqarmat. Oqaatigineqassaaq eqqakkanik navianartunik eqqussinissamik inerteqquteqarnermi, illunit eqqakkanik eqqussinissaq ilaatinneqanngimmat. Illuniit eqqakkat aamma Basel-imi nunani tamalaani isumaqatigiisummi pineqartunut ilaatinneqaraluarput, kisianni nunani tamalaani isumaqatigiisummut ilanngussaq II-imi taaneqarlutik “eqqakkat allat”, taamaalillutillu nunani tamalaani isumaqatigiisummi eqqakkanut navianartunut nassuiaassutip avataaniillutik.

Naggasiutigalugu oqaatigineqassaaq imm. 2 malillugu akuersissutit eqqakkanik ingerlaavartumik eqqussinissamut taamatullu eqqakkanik eqqussinernut ataasiakkaanut tunniunneqarsinnaammata. Naalakkersuisut eqqakkat suussusaat annertussusaallu aammalu Kalaallit Nunaanni passunneqarnissaat pillugit naammattunik paasissutissinneqarsimanissaat, aalajangiisuuginnarpoq.

Imm. 3-imut

Aalajangersakkami § 38, imm. 3 atuuttoq allannguuteqartinnagu ingerlateqqinneqarpoq. Aalajangersakkami imm. 3-imi aalajangersagaq Basel-imi nunani tamalaani isumaqatigiisummut allannguummut, 1995-imi allanngortinneqartumut aammalu Naalakkersuisunit ulloq 7. januar 1998 akuerineqartumut, tunngatillugu isigineqassaaq. Basel-imi nunani tamalaani isumaqatigiisutit allanngortinneqarnerani nunanit ilanngussami VII-miittunit nunanut ilanngussaq VII-minngitsunut eqqakkanik navianartunik avammut annissinissamut inerteqquteqarneq atuutsinneqalerpoq. Ilanngussaq VII-miittuni ilaatinneqarput nunat OECD-miittut aamma EU-miittut kiisalu Liechtenstein. Imm. 3-imi eqqakkat suulluunniit pineqarput, aammalu avammut annissineq taamaallaat Basel-imi nunani tamalaani isumaqatigiisummi pineqartunut ilaasunut taamaallaat pisinnaalluni.

#### Imm. 4-mut

Kiisalu imm. 4-mut siunnersuutigineqarpoq, eqqakkanik avammut nassiussinissaq nunamut Basel-imi isumaqatigiisummut, eqqakkanik navianaatilinnik killeqarfiit qaangerlugit nassiussisarnermut, taakkunungalu piiasarnermut nakkutilliinissamut tunngasumut pisussaangitsaq isumaqarnissamut tunngavissaqarpat, imaluunniit nunamit eqqussivissamit akunniffissamilluunniit eqqakkat tigujumaneqannginnerat pillugu Naalakkersuisunut saaffiginnittoqarsimappat, Naalakkersuisut eqqakkanik aalajangersimasunik avammut nassiussinissamut inerteqquteqarsinnaasut.

#### Imm. 5-imut

Eqqakkanik avammut annissuineq inerteqquteqarnikkut taamaaqataanik maleruagassiivigineqanngilaq, eqqakkallu aalajangersimasumik iluseqartut, Kalaallit Nunaanni eqqakkanik inissiiviusartumi inissinneqaratik, assersuutigalugu Danmarkimi atoqqitassatut avammut anninneqarsinnaasariaqarput. Kisiannili eqqagassalerinerup sammineqarnerunissaa Naalakkersuisut kissaatigisimavaat, Avatangiisinullu aningaasaateqarfik pillugu Inatsisartut inatsisaanni ilaatigut suliaassaqarfimmi tassani suliniuteqarnerit pitsanngorsarneqarnissaat siunertaalluni. Taamaattumik eqqakkat Kalaallit Nunaanni atoqqinneqarsinnaappata ikuallanneqarsinnaallutilluunniit, eqqakkanik avammut annissuineq isumalluutinik naleqqutinngitsumik atuinermik malitseqartutut isigineqarsimasinnaavoq. Tamanna siunertaralugu § 38-imi imm. 5-imut nutaamut siunnersuut, eqqakkanik eqqussuineq avammullu annissuineq pillugu maleruagassanik Naalakkersuisut aalajangersaanissaannut piginnaatitsissummik imaqarpoq. Tamatuma assersuutigalugu eqqakkanik avammut annissinissap eqqarsaatigineqartup nalunaarutiginnissaanut pisussaaffittut ilusilimmik kingusinnerusukkut maleruagassiinissaq periarfissaqartilissavaa.

#### Nr. 4-imut (kapitali 7 a-imi § 40 a)

§ 40 a-mut siunnersuut imaani avatangiisinut inatsimmi § 35 isumassarsiorfigalugu ilusilerneqarpoq. Kisiannili oqaasertai naleqqussarneqarput, aammalu § 40 a annertusineqarpoq, aalajangersakkap avatangiisinut inatsimmut naapertuunnissaa qulakkeerniarlugu.

§ 40 a-mi aalajangersakkamut siunnersuummi mingutsitsinermut Inatsisartut inatsisaata suliarineqarnerani takorloorneqarsimannngitsumut, kisiannili assersuutigalugu nunani tamalaani isumaqatigiisutit naammassinissaannut maleruagassanik aalajangersaanissaq, peqqussuteqarnissaq inerteqquteqarnerlu, imaluunniit naammaginartuik piunasaqaateqarnissaq pisariaqarsinnaappat, inatsisinilu allani aalajangersakkat iluanniititsisoqarsinnaanngippat, maleruagassat atorlugit Naalakkersuisut akuliunnissaannik periarfissiinissaq siunertaavoq. Imaani avatangiisit illersorneqarnissaannut inatsimmi § 35-mut nassuiaatini maleruagassiinissamik pisariaqartitsinermut assersuutitut taaneqarpoq nipiliornermik qaamanermillu mingutsitsinernut maleruagassiineq, ilanngullugu timmissanik imarmiunik qaamanermik sunniineq, taamatullu kissamik aniatitsineq, tamanna avatangiisini ajoqusiinermik malitseqarsinnaalluni. Aammattaaq umiarsuarnut qalipaatinik toqunartunik akulinnik aalajangersimasunik, quajaatinik il.il. naasoqarnissaanik pitsaaliuisussanik atuneq pillugu nunani tamalaani isumaqatigiisutip kingusinnerusukkut ilaaffigilernissaata pisariaqalersinnaanera, taaneqarpoq. § 40 a-mi aalajangersagaq siunnersuutigineqartoq nunami, avatangiisinut inatsimmi piginnaatitsissuteqarnermut aalajangersakkani immikkoornerusuni

ilaatinneqarsinnaanngitsunut, taamatullu pissutsini taamaattuni peqqussuteqarnissamut inerteqquteqarnissamullu, imaluunniit sukumiisunik piumasaaqateqarnissamut maleruagassanik aalajangersaanissamut atorneqarsinnaassaaq.

Avatangiisinut inatsimmi § 2, imm. 2, nr. 2-mi oqaatigineqarpoq, inatsimmi nipiliornermik mingutsitsinissap pitsaaliornissaa akiorneqarnissaalu, siunertaasoq, nipiliornerlu § 3, imm. 1, nr. 2-mi, aamma § 12-imi taaneqarpoq, kisianni qaamanermik kissamillu mingutsitsineq inatsimmi taaneqarani. Qaamanermik mingutsitsineq, qaqqap illuutilluunniit qaammaqquserneqarneranni pisussatut eqqarsaatigineqarsinnaavoq. Kissamik mingutsitsineq, suliffissuarimi suliaqarnermit imermik nillusaammik kuummut kuutsitsinertut ittumik pininnaasoq, eqqarsaatigineqarsinnaavoq.

Imaani avatangiisinut inatsisip avatangiisillu innarlitsaaliorneqarnissaannut inatsisip akornanni mingutsitsinernut sulianullu nutaanut imaluunniit naatsorsuutigineqanngitsunut maleruagassiornissamut assigiimmik periarfissiiniarluni, imaani avatangiisit illersorneqarnissaannut inatsimmi § 35-mi aalajangersagaq avatangiisinut inatsimmi § 40 a-tut nutaatut uteqqinneqarnissaa naleqqunnerpaasoq Naalakkersuisut isumaqarput.

Nr. 5-imut aamma 6-imut (kapitali 11-p qulequtaa kiisalu § 48)  
§ 48-mut aalajangersakkami atuuttumi Naalakkersuisut inatsit malillugu akuersissuteqarnissaq il.il. sioqqullugu tamanut saqqummiussisarneq tamallu akuutinneqarnerat pillugu maleruagassanik erseqqinnerusunik aalajangersaanissamut piginnaatinneqarput. § 48, imm. 1-imi siunnersuutigineqarpoq, aalajangersakkap atuuttup atuuffia annertusineqassasoq, taamaalillunilu aamma innuttaasunut attaveqarnissamut maleruagassanik aalajangersaanissamut periarfissiisoqassasoq. Aalajangersagaq § 48, imm. 2-mi aalajangersakkamut siunnersuutigineqartumut atasutut isigineqassaaq. Imm. 1-imi innuttaasunut ataasiakkaanut attaveqarnissamut maleruagassanik aalajangersaasinnaalernissaq, pingaartumik taamatut attaveqatigiinnerup taamaallaat atortut digitaliusut atorlugit ingerlanneqarsinnaanissaanut maleruagassanik aalajangersaasinnaalernermit tunngasuuvoq.

§ 48, imm. 2-mi aalajangersagaq nutaajuvoq, aammalu Naalakkersuisunut innuttaasunut attaveqateqarneq pillugu maleruagassanik aalajangersaasinnaalernermit periarfissiiffiuvoq, kiisalu imm. 1 malillugu tamat akuutinneqarnerat taamaallaat digitalinngorlugu pininnaasoq, pineqarlutik. Siunnersuut taanna ineriartornerup ukiuni kingulliunerusuni inuiaqatigiinni kalaallini ingerlasup malitsigaa, tassani attaveqatigiinneq oqartussat nittartagaanni tamanut saqqummiinikkut imaluunniit allakkerisarfikkut allakkanut taarsiullugu mail atorlugu ataasiakkaat attaveqatigiinnerisigut, annertusiartuinnartumik pisalerpoq. Erseqqissaatigineqassaaq, piginnaatitsissut aaqqissuussaannut eqqorneqarsinnaasunut oqaloqateqarnikkut atorneqassamat, taamaaliornikkut innuttaasunut, attaveqaatinut teknologi atorlugu attaveqaatinik killilimmik atuisinnaasunut, teknologiimik taamaattumik atuinissamik sungiussisimannngitsunut imaluunniit atuinissamik killiliisunik assigiinngitsunik innarluutilinnut akornusiinnginnerunissaq qulakkeerniarlugu.

§ 48, imm. 1-imut aamma 2-mut aalajangersakkat siunnersuutigineqartut imaani avatangiisinut inatsimmi § 51-imut assingusorujussuupput, taamaattumillu imaani



avatangiisinut inatsimmi § 51-imut nassuiaatit ilitsersuutini amerlanerusunik pissarsivigineqarsinnaapput.

Nr. 7-imut (§ 53, imm. 1)

§ 53-ip allaqqaarnera malillugu, ingerlatassaq mingutsitsisinnaasoq annertuumik mingutsitsinermik imaluunniit annertuumik taamatut mingutsitsinissamik navianaateqarneranik kinguneqarpat, nakkutilliinermut oqartussamut nalunaarutiginninnissamut pisussaaffeqarneq. Taamaattoq mingutsitsineq imaluunniit mingutsitsinissamik navianaateqarnera unittooqattaarnermik imaluunniit ajutoornermik pissuteqarpat, nalunaaruteqartussaataaneq atuutissanngilaq. Naalakkersuisut isumaqarput nalunaartussaataanerup aatsaat ingerlatsinermi uneqattaartoqarpat ajutoortoqarpalluunniit pisusaaneramik piunasaqaateqarnerup nalunaartussaataaneramik killiliisoq.

Taamaattumik inatsisissatut siunnersuummi matumani § 53, imm. 1-imi siunnersuutigineqarpoq naggatit aappaannik nutaamik, nalunaaruteqartussaataaneramik annertusititsisussamik, ilanngussisoqassasoq, taamaalilluni taanna aamma ingerlatsineq uneqattaanngikkaluartoq ajutoortoqanngikkaluartorluunniit, pisorli mingutsitseratarsinnaanerluunniit inatsisilik unioqutitsineruppat atuutissalluni.

Erseqqissaatigineqassaaq, § 53-imi nalunaartussaataaneq Europami inuit pisinnaatitaaffiit isumaqatigiissummi artikel 6-imit killilersimaneqarmat, taannalu malillugu pinerlussimasut oqaaseqannginnissamut paasissutissiinnnginnissamullu pisinnaatitaaffeqarnissaannut inerteqquteqartoqarsinnaavoq. Pinerlussimasut oqaaseqannginnissamut paasissutissiinnnginnissamullu pisinnaatitaaffeqarnissaannut inerteqquteqarnermik atuisoqassatillugu, tassungalu ilanngullugu nakkutilliinermi oqartussaasoq inerteqqutaasumik pisoqarneranik pasitsaassimatillugu, aamma politiinut unnerluussuteqarnissamik pilersaaruteqartillugu, pineqartoq nalunaaruteqarnissamut pisussaaffeqanngilaq, taamatullu nalunaartussaataaneramik atuinissamik pinngitsaaliisoqarsinnaanngilaq. Kisiannili oqartussaasut aalajangersimasumik pasitsaassisoqarsimagaluarpalluunniit nalunaartussaataaneramik atuinissamut taamaallaat pinngitsaaliisariaqarsinnaapput, paasissutissat upalungaarsimanermi akiuiniarnermiluunniit iliuuseqarnissamik aallartitsinissamut atorneqassappata. Pinerlussimasut oqaaseqannginnissamut paasissutissiinnnginnissamullu pisinnaatitaaffeqarnissaannut inerteqquteqarneq uniorlugu paasissutissanik piunasaqartoqarsinappat, paasissutissat pissarsiarineqartut kingusinnerusukkut akisussaasoq eqqartuussivilersuunneqassappat atorneqarsinnaanngillat.

Nr. 8-imut (§ 53, imm. 2)

§ 53-imi imm. 2-p nutaap ilanngunneqarnissaa pillugu siunnersuummi siunertaavoq, inuit suliffeqarfiilluunniit nunaminertamut, imminermini mingutsitsinermik pilersitsiviusinnaasumik ingerlataqarfigineqanngitsumut, taamaakkaluartoq mingutsitsinermik pisoqalerfiusumut, assersuutigalugu uuliatankip kusilersimaneq pissutigalugu, imaluunniit allanik pissuteqartumik mingutsitsisoqarluni, atuisinnaatitaasut nalunaaruteqartussaataanerannik atuutitsilernissaq. Tassani naqissusissallugu pissusissamisoorpoq, nunaminertamik atugassivigineqartup nunaminertamulluunniit atuisinnaatitaasup nakkutilliinermut oqartussanut allat nalunaarutiginninnissaat naatsorsuutigisinnaassanngikkaat, assersuutigalugu mingutsitsinermut pissutaasup inaarutaasumik suussusersineqarsimanngissinnaanera pissutaalluni. Taamaattumik atuisinnaatitaasup nakkutilliinermut oqartussat

nalunaarfigineqarnissaat isumagisussaavaa, taamaalilluni akiuiniarnermik iliuseqarnissaq aallartinneqarsinnaassalluni.

Nr. 9-imut (§§ 54 a aamma 54 b)

Avatangiisinut inatsimmi aalajangersakkat marluusut, soorlu §§ 54 a aamma 54 b ilanngunneqarnissaat pillugu siunnersuummi siunertaavoq, innuttaasut suliffeqarfiillu inatsisitigit isumannaatsuunissaasa pitsanngorsarneqarnissaa. Nakkutiginninnermi paasiniaanermillu suliaqarluni alloriarnermi nakkutilliinermut oqartussanit, Naalackersuisunit kommuninillu suliarineqartussami, avatangiisinut maleruagassat unioqqutinneqarsimanerannik pasitsaassaqaarnerup pasitsaassigallarnertut iluseqarnissaa pisariaqarpoq, tassami pasitsaassaqaarnek qularnarunnaarsinneqarpat aalajangersimanerulerlunilu, pinerluttulerinermut inatsimmi eqqartuussisarnermullu inatsimmi maleruagassat malillugit unnerluussilluni suliaassamik qaqitsisoqassanersoq pillugu apeqqut Kalaallit Nunaanni Politiinit suliarineqartariaqarmat.

Pinerluuteqarsimasunut suliat suliarineqarneranni tunngaviusoq pingaaruteqartoq, assersuutigalugu Kalaallit Nunanut eqqartuussisarnermut inatsimmi § 456, imm. 2-imi oqaatigineqartoq tassaavoq, pasineqartoq unnerluutigineqartorluunniit politiinut eqqartuussivimmiluunniit oqaaseqarnissamik pisussaaffeqannginneranik paasitinneqassasoq. § 457 malillugu unnerluutigineqartoq akiumanngitsoq, pinngitsaalineqaqqussaannqilaq.

Innuttaasoq suliffeqarfilluunniit mingutsitsisoqarsimasinnaanera pillugu oqartussanut nalunaarutiginninnissamik pisussaaffeqartoq pillugu maleruagassanik arlalinnik avatangiisinut inatsit imaqarpoq, takuuk assersuutigalugu § 53, oqartussanullu nalunaarutiginninnginneq § 66, imm. 1, nr. 2 malillugu akiliisitsinermik pineqaatissinneqarnermik malitseqarsinnaasoq. Kisianni nakkutilliinermut oqartussap mingutsitsineq paasippagu, oqartussaq uppersaatissat qulakkeerniarlugit mingutsitsinerluunniit qanoq iluseqarnersoq paasiniarniarlugu pisariaqartunik misissuisinnaavoq.

Aalajangersagaq taanna § 54 b-imik ilassuserneqarpoq, tassani nakkutilliinermut oqartussat allakkanik assiliivimmik assiliinissamut, pappiaqqanik assiliinissamut allakkianilluunniit nassarnissaannut kiisalu akeqanngitsumik pigisanik allanik nassarnissamut piginnaatinneqarlutik. Pigisat taamaattut tassaasinnaapput nioqqutissanit misissugassat imaluunniit nunap iluaniittunit misissugassat il.il., assersuutigalugu laboratoriami misissorneqartussatut eqqarsaatigineqartut, taamaattoqarpallu paasisat politiinut ingerlateqqinneqarsinnaallutik.

§ 54 b imaani avatangiisit illersorneqarnissaannut inatsimmi § 44, imm. 2-imut, imaani avatangiisit illersorneqarnissaat pillugu Inatsisartut inatsisaata allanngortinneqarnera pillugu Inatsisartut inatsisaat nr. 8, 27 november 2018-imeersumi oqaasertalerneqartumut, naapertuuppoq. § 54 a danskit avatangiisit innarlitsaaliorneqarnissaannut inatsisaanni aalajangersakkanik taamaaqataannik isumassarsiarineqarpoq, taanna pisussaaffiit inuit pisinnaatitaaffii pillugit Europami nunani tamalaani isumaqatigiissut malillugu pisussaaffigisavut eqqarsaatigalugit oqaasertalerneqarluni.

Nr. 10-imut (kapitali 13 a-imi § 59 a)

Innuttaasut suliffeqarfiillu kommunimit Naalackersuisunilluunniit akuersissummik, akuersissuteqarnermik immikkulluunniit akuersissuteqarnermik tigusaqarsimasut, oqartussap aalajangiinerani killissaliussat piunasaqaatillu ingerlatassami suliaqarnermi malinneqartussat aalajangersarneqarsimasut tatigalugu inississinnaamissaat, aallaaviatigut pingaaruteqarpoq. Inissinnissamut isiginninneq taanna, avatangiisinut inatsimmi pingaartumik immikkut mingutsitsisumik suliaqarnerit pillugit kapitali 5 malillugu akuersissutinut atatillugu, akuerisaavoq. Tassani § 24-imi aalajangerneqarpoq, avatangiisinik tamanna tunngavilersorneqarsinnaappat, Naalackersuisut akuersissuteqareernerup kingorna aatsaat ukiut arfineq pingasut sinnerlugit ingerlareerneranni, nutaamik akuersissummik tunniussillutik, tamatumunnga atugassarititaasut allanngortissinnaagaat. Inuussutissarsiutinut aalajangersimasunut taamaattoq ukiut sisamaapput.

Kisiannili teknologiikkut ineriartornerup naliliineq taanna, akuersissut immikkulluunniit akuersissuteqarnek tunniunneqarmat tunngavigineqarsimasoq, killeqqussimasinnaavaa. Assersuutigalugu imikoornernik saliinermut periaatsit nutaat ineriartortinneqarsimasinnaapput, ataavartumilluunniit nukissiuutinut innaallagiamik atuisinnaaneq ima akikitsigilersimasinnaavoq, aamarsuit ikummatissarlunniit nunap iluaneersuusoq atorlugit innaallagissiorneq imminut akilersinnaajunnaarsimalluni naleqqutinngitsumillu mingutsitsilluni. Aamma imaassinnaavoq nunani tamalaani inuiaqatigiit, assersuutigalugu plastikkinik arrortikkuminartunik atuinissamut piunasaqaatinik ineriartortitsisimasut, taamaattumik atortussanik arrortikkuminaatsunik atuinissamut akuersissut inuiaqatigiinnut naleqqutinngitsumik nammagassiissalluni.

Akuersissutit, akuersissuteqarnerit immikkullu akuersissuteqarnerit inatsit imaluunniit siusinnerusukkut inatsisaasimasoq naapertorlugu tunniunneqarsimasut, avatangiisit eqqarsaatigineqarnissaat imaluunniit nunani tamalaani isumaqatigiissutit malinneqarnissaat eqqarsaatigalugit tamanna pisariaqarpat, uterteqquneqarsinnaasut pillugu aalajangersagaq, imaani avatangiisit illersorneqarnissaannut inatsimmi § 57-ip akuerineqarnerani Inatsisartut akueraat.

Naalackersuisut isumaqarput aalajangersagaq taamaattoq avatangiisinut inatsimmi aamma ilanngunneqartariaqartoq. Kisianni imaani avatangiisit illersorneqarnissaannut inatsimmi § 57-imi pisutut, allanngortitsineq utertitsinissarlunniit utertitsinissamut naleqquttumik piffissaliinermik ilaqartinneqassasoq pillugu maleruagassamik aalajangersagaq piunasaqaatitaqartariaqarpoq.

Piffissamut killiliusaaq taamaattoq qanoq sivisutigissanersoq, ataatsimut isigalugu aalajangerneqarsinnaanngilaq, allanngortitsinerli avatangiisit eqqarsaatigalugit nunaniluunniit tamalaani isumaqatigiissutit malillugit tunngavilersorneqarnissaanik piunasaqaammik allanngortitsinerup utertitsinissalluunniit tunngavilersorluagaallunilu pisariaqarnissaa piunasaqaataavoq.

Innuttaasooq suliffeqarfilluunniit isumaqaruni utertitsinissami piunasaqaat taanna naammassineqarsimanngitsoq, piffissamulluunniit killiliusaaq sivikippallaartoq, innuttaasup utertitseqqusineq pillugu aalajangiineq taamaattoq Avatangiisit Innarlitsaaliorneqarnissaat pillugit Naammagittaalliuuteqartarfimmuut, takuuk inatsimmi §§ 60-64, imaluunniit eqqartuussivinnut naammagittaalliutigisinnaassavaa, tassungalu

ilanngullugu taamaattoqarpat taarseeqqusisinnaanissamut eqqartuussiviit isummernissaat aamma piumasarisinnaallugu.

Nr. 11-imut (§ 66)

Imm. 1-imut

Inatsimmi § 66, imm. 1, nr. 2-5-ip allanngortinneqarnissaani pineqarpoq, mingutsitsisoqarsimasoq pillugu nalunaarutiginninnginnermut akiliisitsinissaq pillugu nr. 2-imi § 53, imm. 2-mut nutaamut innersuussisoqartoq.

Nr. 3-imi, akuersissummik piniangitsoorsimanermut akiliisitsisarnermut tunngasumi § 32, imm. 2-mut innersuussummik tapiliussisoqarnissaa siunnersuutigineqarpoq, taamaalillunilu Naalakkersuisut akuersiteqqaarnagit imermik pilersuivinni akuerisani allannguinerit pineqaatissiiffiusinnaalissallutik. Taamaalilluni imermik pilersuivimmik akuerineqanngitsumik atuilerneq, tak. § 32, imm. 1, § 66, imm. 1, nr. 3-mi pineqaatissiiffiusinnaareerpoq. Taamaattumillu imermik pilersuivinni akuerisani siumoortumik akuersissuteqarfigineqanngitsunik allannguinerit aamma pineqaatissiiffiusariaqartut naliliisoqarpoq. Kiisalu inatsimmi § 38, imm. 2-imut, eqqakkanik eqqussinerit Naalakkersuisunit akuerineqartussaanerannik aalajangersaaffiusumut tunngatillugu innersuussuteqarnissaq siunnersuutigineqarpoq.

Peqqusissummik, inerteqquteqarnermik atugassarititaasumilluunniit unioqqutitsinermut akiliisitsisarneq pillugu § 66, imm. 1, nr. 4-p allanngortinneqarnerani, § 16-imut aamma § 30, imm. 2-mut aamma innersuussisoqarpoq, taanna malillugu siunissami imeqarfissap timaanniittuni aalisarnissap, angalaarnissap il.il. inerteqqutigineqarnerat pillugu piunnaasaatinik Naalakkersuisut aalajangersaasinnaallutik. Maannamut oqaasertalerneqarnerani § 36, imm. 3, kukkuneq 2011-imi inatsisip akuerineqarnerani pisimasoq iluarsiniarlugu § 36, imm. 4-mut aamma allanngortinneqarpoq. § 27-mut innersuussineq peerneqarpoq, taassuma § 66, imm. 3-imiittussaanera pissutigalugu. Taamatuttaaq § 40 a-mut innersuussut ilanngunneqarpoq, taamaalillunilu peqqussutinik, inerteqqutinik imaluunniit § 40 a tunngavigalugu piunnaasaatinik unioqqutitsinerit akiliisussanngortitsinermik pineqaatissiiffiusassapput. Kiisalu § 42-mut innersuussutip peerneqarnissaa siunnersuutigineqarpoq. § 42 inatsisitigut tunngavissanut aalajangersagaavoq, taamaattumillu aalajangersakkamik taassuminnga unioqqutitsisoqarsinnaanngilaq.

Unioqqutitsinernut aalajangersimasunut akiliisitsisarneq pillugu § 66, imm. 1, nr. 5-imi § 53, imm. 2-mut innersuussineq, § 53, imm. 3-mut allanngortinneqarpoq, § 53-imi imm. nutaap siunnersuummi ilanngunneqarnera pissutigalugu, taamaalilluni maannamut imm. 2-usoq imm. 3-nngormat.

Imm. 2-imut

§ 66, imm. 2-imi inatsisip oqaasertai, § 35, imm. 1-ip unioqqutinneqarnerani pineqaatissiissutissanik aalajangersaavusoq, allanngortinnagu ingerlateqqinneqarpoq, tassanilu taamaallaat oqaasertai aalajangersakkap imaanik allanngortitsinngitsunik iluarsineqarput.

Imm. 3-imut

§ 66, imm. 3-mi aalajangersakkami maleruagassani, inatsimmi inatsisitigut tunngavissanut aalajangersakkat immikkut ittut naapertorlugit suliarineqarsimasuni pineqaatissiisarnermut aalajangersakkanik aalajangersaanissamut Naalakkersuisut piginnaatinneqarput. Imm. 3-mi allattorsimasut § 36, imm. 3-mut, § 38, imm. 5-imut, aamma § 40 a-mut innersuussinermik annertusineqarput.

Tamatuma saniatigut aalajangersakkap oqaasertaata iluarsineqarnissaa siunnersuutigineqarpoq, § 66, imm. 3-imi atuuttumi, avatangiisinut inatsimmi § 10, § 18, § 19, imm. 4, § 27, § 34, § 36, imm. 3, § 38, imm. 5, § 40, § 40 a aamma § 42 naapertorlugit pineqaatissiinermut maleruagassat suut nalunaarummi aalajangersarneqarsinnaanersut nalornilersitsisinnaasumi, nassuiarneqarnissaa nalornissutaasinnaajunnaarlugu. Oqaasertai siunnersuutigineqartut imaani avatangiisinut inatsimmi § 63, imm. 1, naggat siullermi aalajangersakkamit assingusumit tigusaapput.

Allangortitsinermut tunngaviuvoq § 66, imm. 3-ip atuuttup naleqqutinngitsumik oqaasertalerneqarnera, peqqusissuteqarnernik, inerteqquteqarnernik atugassarititaasunillu unioqqutitsinermut akiliisitsilluni pineqaatissiisarneq pillugu Naalakkersuisut maleruagassanik aalajangersaasinnaajunnaarlugit nassuiarneqarneranik malitseqarsinnaasoq, Naalakkersuisut eqqumaffigilersimammassuk. Taamaalilluni § 66, imm. 3 atuuttoq nalunaarummi aalajangersakkanik unioqqutitsinermut akiliisitsinermik pineqaatissiisarneq pillugu maleruagassanik aalajangersaanermut nalorninangitsumik atornerqarsinnaalerluni, nalunaarutillu taakkua naapertorlugit peqqusissuteqarnermik, inerteqquteqarnermik imaluunniit atugassarititaasunik unioqqutitsinermut akiliisitsilluni pineqaatissiisarneq pillugu maleruagassanik aalajangersaanissaq § 66, imm. 3-imi akuerineqarnersoq, ersareqqissaarani.

Assersuutigalugu nalunaarummi mingutsitsinermut aalajangersimasumut inerteqquteqarnermik, mingutsitsinerup peerneqarnissaa pillugu peqqusissuteqarsinnaanermut ataqatigiisillugu, aalajangersaanissaq kissaatigineqarpat, § 66, imm. 3-imi atuuttumi taamaallaat mingutsitsinissamik inerteqquteqarnerup unioqqutinneqarneranut akiliisitsilluni pineqaatissiisarneq pillugu maleruagassanik aalajangersaanissaq kisimi akuerisaasoq, kisianni mingutsitsinerup peerneqarnissaa pillugu tamatuma kingorna peqqusissuteqarnerup unioqqutinneqarneranut akiliisitsinermik pineqaatissiisoqarsinnaanani, tunngavilersuutigineqarsinnaassaaq.

Taamatut nassuiaanissap nalornissutigineqarsinnaajunnaarsinnissaanut siunnersuutigineqarpoq § 66, imm. 3-ip oqaasertalerneqarnera atitunerulaartinneqassasoq ersarinnerulersinneqassasorlu, taamaalilluni § 66, imm. 3-imi akiliisitsinermik pineqaatissiisarneq pillugu maleruagassiinissamut annertuumik periarfissiisoqartoq, nalornissutigineqarsinnaajunnaarluni, ilanngullugit peqqusissuteqarnerup, inerteqquteqarnerup atugassarititaasullu malinneqannginnerannut akiliisitsisarneq pillugu maleruagassat.

## *§ 2-imut*

Aalajangersagaq nalinginnaasumik atuutsitsilernissamut aalajangersagaavoq.

## Ilanngussaq 1

| <b>Inatsisissatut siunersuutip inatsimmut atuuttumut ataqatigiissusaa</b>   |  |
|---|--|
| <i>Inatsisit atuuttut</i>   | <i>Siunnersuut</i>   |
|   | <b>§ 1</b><br><br>Avatangiisit innarlitsaaliorneqarnissaannik Inatsisartut inatsisaanni nr. 9-mi, 22. november 2011-meersumi, Inatsisartut inatsisaatigut nr. 1-ikkut, 29. maj 2012-imeersukkut aamma Inatsisartut inatsisaatigut nr. 10-kkut, 27. november 2018-imeersukkut allannguuteqartinneqartumi ukuninnga allannguisoqassaaq:  |
| § 4. Aatsitassat pillugit ingerlatallu tamatumunnga pingaarutillit pillugit Inatsisartut inatsisaanut suliat ilaatinneqartut pillugit maleruagassanik aalajangersaasernerit Inatsisartut inatsisaannut ilaatinneqanngillat.   | 1. § 4 ima allanneqassaaq.<br>”§ 4. Inatsisartut inatsisaannut sulianut, kalaallit aatsitassarsiornermut inatsisaannut ilaatinneqartunut atatillugu avatangiisit innarlitsaaliorneqarneri ilaatinneqanngillat, taakkunungalugu maleruagassiuineq, nakkutilliineq, upalungaarsimaneq akiuiniarnerlu ilaapput.”  |
| § 33. Kapitali manna naapertorlugu suliani tamani tamanna sioqqullugu kommunalbestyrelsi, Nunatsinni Nakorsaaneqarfik aamma Namminersorlutik Oqartussani Uumasunut Nakorsaqaarnermik immikkoortortaq tusarniaaffigereernerisigut Naalakkersuisut aalajangiisassapput.   | 2. § 33 imatut oqaasertalerneqassaaq:<br>” § 33. Kapitali manna naapertorlugu suliani tamani Naalakkersuisut kommunalbestyrelsimut, Nakorsaaneqarfimmut aamma Kalaallit Nunaanni Nersutit Nakorsaqaarnermi Inuussutissalerinermilu Oqartussaasunut tusarniaaereerlutik aalajangiisassapput.”   |
| § 38. Nunanit allanit eqqakkanik Kalaallit Nunaannut eqqussuisoqarnissaa inerteqqutaavoq, tamatumani atoqqiinissaq siunertaralugu eqqakkat naviananngitsut pineqanngippata.<br><i>Imm. 2.</i> Eqqakkanik nunanit allanut eqqussuinissaq Naalakkersuisunit akuersissutigineqassaaq.<br><i>Imm. 3.</i> Nunanut, nunat killeqarfii akimorlugit, eqqakkanik navianartunik assartuisarnermi taakkualu iginneqartarnerisa nakkutigineqarnerat pillugit Baselimi isumaqatigiisummut ilaasunut eqqakkanik nunanut allanut taamaallaat aallarussisoqarsinnaavoq. | 3. § 38 imatut oqaasertalerneqarpoq:<br>” § 38. Kalaallit Nunaannut eqqagassanik eqqussinissaq inerteqqutaavoq, taamaattorli imm. 2 takuuk.<br><i>Imm. 2.</i> Eqqagassat pineqartut annertussusaannut suussusaannullu passussinissamut Kalaallit Nunaanni naammattunik periarfissaqartoq Naalakkersuisut naliliippata, Naalakkersuisut eqqakkanik eqqussinissamut akuersissuteqarsinnaapput. Inissinissaq siunertaralugu eqqussinissamut akuersissummik tunniussisoqarsinnaanngilaq taamatullu eqqagassanik navianartunik eqqussinissamut akuersissummik tunniussisoqarsinnaanani.<br><i>Imm. 3.</i> Nunanut, nunat killeqarfii akimorlugit, eqqakkanik navianartunik assartuisarnermi taakkualu iginneqartarnerisa nakkutigineqarnerat pillugit Basel-imi isumaqatigiisummut ilaasunut eqqakkanik nunanut allanut taamaallaat aallarussisoqarsinnaavoq. |

|   |  |
|---|--|
|   | <p><i>Imm. 4.</i> Nuna eqqussivissaq imaluunniit nunat akunniffissat eqqakkanik tiguserusunnginnissaat tunngavissalimmik ilimagineqarpat, Naalakkersuisut eqqakkanik avammut nassiussinissamut inerteqquteqarsinnaapput.</p> <p><i>Imm. 5.</i> Naalakkersuisut eqqakkanik eqqussisarnermut avammullu nassiussisarnermut maleruagassanik aalajangersaasinnaapput.”</p>  |
|   | <p><b>4.</b> Kapitali 7 kingorna ikkunneqassaaq:</p> <p style="text-align: center;"><b>“Kapitali 7 a</b><br/><i>Mingutsitsinerit allat</i></p> <p>§ 40 a. Naalakkersuisut nukissiuutit, akuutissat atortussalluunniit sulianit pisut, Inatsisartut inatsisaanni aalajangersakkanut allanut ilaanngitsut atorlugit mingutsitsinissap pinaveersaartinnissaanut akornusernissaanullu maleruagassanik aalajangersaasinnaapput, peqqussuteqarsinnaapput imaluunniit inerteqquteqarsinnaapput, kiisalu piumasqaateqarsinnaallutik, suliat taakku inatsimmut allanut ilaanngippata.”</p>  |
| <p><b>Kapitel 11</b><br/><i>Tamanut saqqummiussisarneq</i></p>  | <p><b>5.</b> Kapitali 11-ip qulequtaa imatut oqaasertalerneqassaaq:<br/><i>”Attaveqaqatigiinneq tamanullu ammasumik saqqummiussisarneq”</i></p>  |
| <p>§ 48. Naalakkersuisut tamanut saqqummiussisarneq aamma innuttaasut peqataatinneqarnissaat, akuersissutit akuerineqarnerillu allallu inatsit naapertorlugu aalajangiinerit sioqqullugit pisarnissaat pillugit erseqqinnerusunik maleruagassanik aalajangersaasinnaapput. Taamatuttaaq inatsimmi pineqartunut tunngatillugu innuttaasut peqataatinneqarnissaat pillugu pilersaarusiortoqarnissaanik Naalakkersuisut maleruagassanik aalajangersaasinnaapput.</p> | <p><b>6.</b> § 48 imatut oqaasertalerneqassaaq:<br/>” § 48. Inatsisartut inatsisaat malillugu akuersissutit, akuersissutinik tunniussinissaq allanilluunniit aalajangiinissaq nalunaaruteqarnissarlunniit sioqqullugu Naalakkersuisut innuttaasunik attaveqaqateqartarnermut, tamanut ammasumik saqqummiussisarnermut tamanillu akuutitsisarnermut maleruagassanik sukumiinerusunik aalajangersaasinnaapput. Aamma Naalakkersuisut Inatsisartut inatsisaanni suliaasaqarfinnut tunngatillugu pilersaarusiornermi tamanik akuutitsinissamut maleruagassanik aalajangersaasinnaapput.</p> <p><i>Imm. 2.</i> Naalakkersuisut imm. 1 naapertorlugu innuttaasunik attaveqaqateqarnermi kiisalu tamanut ammasumik saqqummiussinermi aammalu tamanik akuutitsinermi taamaallaat atortut digitaliusut atorneqarnissaanut maleruagassanik aalajangersaasinnaapput.”</p> |
| <p>§ 53. Suliaqarnermi mingutsitsisoqarneranik pissutaasinnaasunut akisussaasoq, ingerlatsinermi</p>  | <p><b>7.</b> § 53, imm. 1-imi naggatip aappaattut ikkunneqassaaq:</p>  |

|   |   |
|---|---|
| <p>akornuteqartoqarpat imaluunniit ajutoorneq annertuumik mingutsitsinermik kinguneqarpat imaluunniit taamaattoqarsinnaanera navianartoqarpat, erngerluni pisortatut nakkutilliisunut nalunaaruteqassaaq.</p> <p><i>Imm. 2.</i> Suliaqarnermi mingutsitsisoqarnermik pissutaasinnaasunut akisussaasoq, mingutsitsinerup annertusinissaa pinngitsoortinniarlugu imaluunniit mingutsitsisoqarnissaanik navianartorsiorneq pitsaaliiorlugu, annertuumik mingutsitsisoqarsinnaaneranik navianartoqartillugu atortussianik il.il. mingutsitsisunik aniatitsineq erngerluni unitsissavaa.</p> | <p>”Nalunaaruteqartussaataaneq taanna Inatsisartut inatsisaat imaluunniit taanna tunngavigalugu maleruagassiat aalajangersarneqartut uniorlugit suliaq mingutsitsinermik kinguneqarpat imaluunniit tamatumunnga ulorianartorsiortitsippat atuutissaaq.”</p> <p><b>8.</b> § 53, imm. 1-ip kingorna immikkoortoq nutaaq una ikkunneqassaaq:<br/> ” <i>Imm. 2.</i> Nunaminertami mingutsitsisoqartoq paasineqarpat, nunaminertamik atugassinneqarsimasoq imaluunniit atuisinnaatitaasoq erngerluni nakkutilliinermut oqartussaasunut nalunaaruteqassaaq.”</p> <p>Tamatuma kingorna <i>imm. 2 imm. 3-nngorpoq.</i></p>  |
|   | <p><b>9.</b> § 54-ip kingorna ikkunneqassaaq:<br/> ” <b>§ 54 a.</b> Inuk imaluunniit suliffeqarfik nakkutilliinermut oqartussaasunut ilisimatitsinissamik kissaateqanngippat, suliap Kalaallit Nunaannut eqqartuussisaaseq pillugu inatsit naapertorlugu misissuinerup ingerlaqqinnissaanut atugassatut Kalaallit Nunaanni Politiinut tunniunneqannginnerani pineqartup akiligaanik nakkutilliinermut oqartussaasut pisariaqartinneqartunik misissuissapput, Inatsisartut inatsisaat imaluunniit taanna tunngavigalugu maleruagassiarineqartut unioqqutinneqarsimanersut misissuiffigalugu.</p> <p><b>§ 54 b.</b> Inatsisartut inatsisaanni matumani maleruagassat naapertorlugit nakkutilliinermi akulerunnermiluunniit nakkutilliinermut oqartussaasut uppersaatissanik assiliisinnaapput, assileeqqissinnaapput tigusinnaallutilluunniit imaluunniit pigisanik allanik tigusinnaallutik. Allagaatit pigisallu tiguneqarsimaneranut atsiorneq tunniunneqassaaq. Allagaa tit pigisallu misissueqqissaarnermut atorneqartussaangitsut misissuinermiit kingusinnerpaamik ulluinnaat 14-it qaangiutsinnagit suliffeqarfimmut utertinneqassapput.”</p> |
|   | <p><b>10.</b> Kapitali 13 kingorna ikkunneqassaaq:<br/> <b>“Kapitali 13 a</b><br/> <i>Aalajangersakkat allat</i></p> <p><b>§ 59 a.</b> Avatangiisit eqqarsaatigineqarnerini imaluunniit nunani tamalaani isumaqatigiissutit malinniarneqarnerini pisariaqartinneqarpat,</p>   |



|  |   |
|--|---|
|  | <p>Inatsisartut inatsisaat manna imaluunniit avatangiisinik innarlitsaaliuinermut maleruagassaasimasut naapertorlugit akuersissutitut tunniunneqartut, akuersissutit aamma immikkut ittumik akuersissutit allanngortinneqarsinnaapput utertinneqarsinnaallutilluunniit. Allanguineq utertitsinerluunniit sapinngisamik tamatumunnga piffissaliussamik naammagintumik malitseqartinneqartassaaq.</p> <p><i>Imm. 2.</i> Imm. 1 akuersissutitut, kapitali 5-imut ilaatinneqartunut atuutinngilaq.”</p>   |
| <p><b>§ 66.</b> Akiliisitaasussanngortitaasinnaavoq :</p> <p>1) § 35, imm 3, § 52 imaluunniit § 54, imm. 1-2 naapertorlugu noqqaaffigineqarnerminik malinninngitsoq.</p> <p>2) § 53, imm. 1 naapertorlugu nalunaaruteqanngitsoq.</p> <p>3) § 19, imm. 1 aamma imm. 3, § 31, imm. 2 imaluunniit § 32, imm. 1 naapertorlugu akuersissummik pissarsiniaqqaarsimangitsoq.</p> <p>4) § 17, imm. 1-3, §§ 20-23, § 25, § 27, § 30, imm. 1, § 36, imm. 3, § 42, § 49, imm. 5, § 50 imaluunniit § 54, imm. 3 naapertorlugu peqqusinermik, inerteqquteqarnermik imaluunniit piumasagaatinik unioqutitsisoq.</p> <p>5) § 15, imm. 1-2-mi, § 28, imm. 2-mi, §§ 37-38-mi, § 41, imm. 1-mi, § 53, imm. 2-mi imaluunniit § 64, imm. 1-imi aalajangersakkanik unioqutitsisoq.</p> <p><i>Imm. 2.</i> § 35, imm. 1-imik unioqutitsisoq akiliisitaasussanngortitaasinnaavoq, eqqakkanik pilersitsinermigut, uninngatitsinermigut, passussinermigut imaluunniit peersinermigut</p> <p>1) allat peqqissusiannik ulorianartorsiortitsisoq, imaluunniit</p> <p>2) silaannarmik, imermik, sermimik, qaqqamik imaluunniit nunamik mingutsitsinermik pilersitsisoq.</p> <p><i>Imm. 3.</i> § 10, § 18, § 19, imm. 4, § 27, § 34, § 40 aamma § 42 naapertorlugit maleruagassiani atulersinneqartuni aalajangersakkanik unioqutitsineq akiliisitaasussanngortitsineq pillugu aalajangersaasoqarsinnaavoq.</p> | <p><b>11.</b> § 66 imatut oqaasertalerneqarpoq:</p> <p>” <b>§ 66.</b> Akiliisitsinermik pineqaatissinneqarsinnaavoq:</p> <p>1) § 35, imm. 3, § 52, aamma § 54, imm. 1 aamma 2 malillugit peqquneqarnerminik malinninngitsoq.</p> <p>2) § 53, imm. 1 aamma 2 naapertorlugit nalunaaruteqanngitsoortoq.</p> <p>3) § 19, imm. 1 aamma 3, § 31, imm. 2, § 32, imm. 1 aamma 2, aamma § 38, imm. 2. naapertorlugit akuersissummik pissarsiniangitsoortoq.</p> <p>4) § 16, § 17, imm. 1-3, §§ 20-23, § 25, § 30, § 36, imm. 4, § 38, imm. 4, § 40 a, § 49, imm. 5, § 50, aamma § 54, imm. 3 naapertorlugit peqqussuteqarnermik, inerteqquteqarnermik piumasagaateqarnermilluunniit unioqutitsisoq.</p> <p>5) § 15, imm. 1- 2 § 28, imm. 2, § 37, § 38, imm. 1 imaluunniit imm. 3, § 41, imm. 1, § 53, imm. 3, aamma § 64, imm. 1-inik unioqutitsisoq.”</p> <p><i>Imm. 2.</i> § 35, imm. 1-imik unioqutitsisoq akiliisitsinermik pineqaatissinneqarsinnaavoq, eqqagassaqalersitsilluni, eqqagassanik uninngatitsilluni, assartuilluni imaluunniit eqqakkanik eqqaalluni</p> <p>1) allat peqqissusaannik navianartorsiortitsisoq, imaluunniit</p> <p>2) silaannarmi, imermi, sermimi, qaqqami imaluunniit nunami mingutsitsisoq.</p> <p><i>Imm. 3.</i> § 10, § 18, § 19, imm. 4, § 27, § 34, § 36, imm. 3, § 38, imm. 5, § 40, § 40 a imaluunniit § 42 naapertorlugit akiliisitsinermi akisussaasuusoq pillugu maleruagassanik aalajangersaasoqarsinnaavoq.”</p> |
|  | <p style="text-align: center;"><b>§ 2</b></p> <p>Inatsisartut inatsisaat manna xx.xx 2021-mi atuutilissaaq</p>  |

